

明史藁

列傳第一百九十四

光祿大夫

經筵講官明史總裁戶部尚書加七級

臣王鴻緒奉

敕編撰

外國十

朝鮮

朝鮮箕子所封國也漢以前曰朝鮮始爲燕人衛滿所據漢武帝平之置置番臨屯樂浪元菟四郡漢末有扶餘人高氏據其地改國號曰高麗又曰高句麗居平壤卽樂浪也已爲唐所破東徙後唐時王建代高氏兼并新羅百濟地徙居松岳曰東京而以平壤爲西京其國北鄰契丹西則女直南曰日本元至元中西京內屬置東寧路總管府蓋慈嶺爲界明

興王高麗者王顓太祖卽位之元年遣使賜璽書二年送還其國流人顓表賀貢方物且請封爵帝遣符璽郎僕斯齋詔及金印詔文封顓爲高麗國王賜曆及錦綺其秋顓遣總部尚書成惟得千牛衛大將軍金甲兩上表謝并賀天壽節中官及皇太子皆有獻因請祭服制度帝命工部製賜之冬十月惟得等辭歸帝從容問王居國何爲城郭修乎兵甲利乎宮室壯乎頓首言東海波臣惟知崇信釋氏他未遑也遂以書諭之曰古者王公設險未嘗去兵民以食爲天而國必有出政令之所今有人民而無城郭人將何依武備不修則威弛渤海之地不耕則民艱於食且有居屋無廳事無以示尊嚴此數者朕甚不取也夫國之大事在祀與戎苟闕斯二者

而徒事佛求福梁武之事可爲明鑑王國北接契丹女直而南接倭備禦之道王其念之因賜六經四書通鑑等書先是高麗使言王有姪女遭亂相失帝令中使訪得之至是給衣糧令護歸三年正月命使往高麗祀其國山川之神是歲頒科舉詔於高麗顓表謝貢方物并納元所授金印中書省言高麗使者入貢多齎私物貨鬻宜征稅又奏使者多攜中國物出境禁之便俱不許時高麗貢獻數至元旦及聖節皆遣使朝賀歲以爲常五年顓表請遣子弟入太學帝曰入學固美事但涉海遠不欲者勿強又請徙耽羅國所留蒙古人及征蘭秀山逋寇詔不許時貢使洪師範鄭夢周等共百五十餘人來京師範等三十九人失風溺死帝憫之遣元樞密使

延安答里往諭入貢毋數而顓復遣其門下贊成事姜仁裕
來貢馬其賀正且使金涇等已先至帝悉遣還謂中書省臣
曰高麗貢獻繁數旣困敝其民而涉海者復虞覆溺古者諸
侯於天子比年小聘三年大聘九州之外世見而已高麗去
中國近稍知禮樂宜遵三年一聘之禮貢物惟所產毋過侈
其明諭朕意六年顓遣甲兩等貢馬五十匹道亾其二甲兩
以聞及進以私馬足之帝惡其不誠却之賜顓書自後遣使
須擇人七年顓遣監門護軍周誼鄭庇等來貢表請每歲一
貢貢道從陸由定遼毋涉海其貢物稱送太府監中書省言
元時有太府監王收貢物本朝未嘗有言涉不誠帝命中書
貢之却其貢是歲顓爲樞相李仁人所弑顓無子以寵臣辛

肫之子禍爲子於是仁人立禍八年禍遣判宗簿事崔原來告哀且言前有貢使金義殺朝使蔡斌今嗣王禍已誅義籍其家帝疑其詐拘原而遣使往祭弔十年使來請故王顓諡號帝曰顓被弑已久今始請諡將假吾朝命鎮撫其民且以掩其弑逆之迹耳不可許前所留使者其遣之於是釋原歸其夏復遣誼貢馬及方物却不受冬又遣使賀明年正月旦帝諭中書省臣曰高麗王顓自奉表朝貢願世爲臣妾後被奸臣所弑貢使來皆云嗣王所遣莫明其實故拘使詢之終不得詳乃敕歸之未幾復遣使至却而不納尋以朝正爲名奉表貢馬皆稱嗣王如此者五朕觀高麗君臣自漢而唐而元屢降屢叛今王顓被弑奸臣竊命春秋之義亂臣必誅

夷又傳言第前後使者皆稱嗣王所遣中書宜遣人往問嗣王如何政令安在若政令如前嗣王不爲羈囚則當依前王言歲貢馬千匹明年貢金百斤銀萬兩良馬百細布萬仍悉送還所拘遼東民方見王位真而政令行朕無惑已否則弑君之賊必討無赦其以朕意諭焉十一年四月禍復命誼來貢至冬遣歸十二年敕遼東守將潘敬葉旺等謹飭邊備其冬禍遣其臣李茂芳等來貢以不如約却之十三年遼東送高麗使誼至京師帝敕敬等曰高麗弑君又殺朝使前堅請入貢及與之約又不如期今遣誼來以虛文飾詐他日必爲邊患自今來者其絕不通因留誼於京師遣通事先回十六年高麗來貢却之命禮部責其朝貢過期陪臣侮慢之罪誠

欲聽約者當以前五歲違約不貢之物并至十七年六月禍遣司僕正崔涓禮儀判書金進宜貢馬二千匹且言金非地所產願以馬代輸餘皆如約遼東守將延安侯唐勝宗爲之請帝許之然請顓諡號及襲王爵未允也十八年正月貢使至帝諭禮臣曰高麗王顓被弑其國屢請約束朕數不允聽彼自爲聲教而其請不已故索歲貢以試其誠僞非以此爲富也今旣聽命宜損其貢數令三年一朝貢馬五十匹至二十一年正旦乃貢其以此諭之七月禍上表請襲爵并請故王顓封諡命從其請封禍爲高麗國王賜故王顓諡恭愍頒詔於其國十二月遣使朝貢十九年二月遣使貢布萬匹馬千匹九月表賀貢方物其後貢獻歲不絕每踰常額且未嘗

至三年也冬詔遣指揮僉事高家奴以綺布市馬於高麗二十年三月高家奴還陳高麗表辭馬值帝不聽敕如數償之先是元末遼瀋兵起民避亂轉徙高麗至是因市馬帝令就索之遂以遼瀋流民三百餘口來歸十二月命戶部咨高麗王鐵嶺北東西之地舊屬開元者遼東統之鐵嶺之南舊屬高麗者本國統之各正疆境毋侵越二十一年四月禍表言鐵嶺之地實其世守乞仍舊使帝曰高麗舊以鴨綠江爲界今飾辭鐵嶺詐僞昭矣禮部以朕言諭之俾安分毋生釁端八月高麗千戶陳景來降言是年四月禍欲寇遼東使都軍相崔瑩李成桂繕兵西京成桂使景屯艾州以糧不繼退師王怒殺成桂之子成桂還兵攻破王城囚王及瑩景懼及故

降帝敕遼東謹烽堠嚴守備仍遣人偵之十月禍請遜位於其子昌帝曰前聞其王被囚此必成桂之謀姑俟之以觀變二十二年權國事昌奏乞入朝帝不許是歲成桂廢昌而立定昌國院君瑤二十三年正月遣使來告二十四年三月詔市馬高麗八月權國事瑤進所市馬千五百匹帝謂禮部曰三韓君臣悖亂二紀於茲今王瑤嗣立乃王氏苗裔宜遣使勞之遂命以所市馬送廣寧中護等衛牧養十二月瑤遣其子奭朝賀明年正旦奭未歸而成桂遂廢瑤自立王氏自五代傳國數百年至是絕二十五年九月高麗知密直司事趙胖等持國都評議司奏言本國自恭愍王薨無嗣權臣李仁人以辛旽子禍主國事昏暴好殺至欲興師犯邊大將李成

桂以爲不可而回軍禍負罪惶懼遜位於子昌國人弗順啓
請恭愍王妃安氏擇宗親瑤權國事已及四年昏戾信讒戕
害勲舊子奭癡騃不慧惟縱酒色國人謂瑤不足主社稷今
以安氏命退瑤於私第王氏子姓無可當輿望者中外人心
咸繫成桂臣等與國人耆老共推主國事惟聖主俞允帝以
高麗僻處東夷非中國所治且事有隱曲未可信令禮部移
諭果能順天道合人心不啓邊釁使命往來實爾國之福我
又何誅其冬成桂聞皇太子薨率羣臣制服遣使表慰并請
更國號帝命仍舊號曰朝鮮二十六年二月遣使進馬九千
八百餘匹命指揮王彙運紵絲絛布一萬九千七百餘匹酬
之六月成桂表謝貢馬及方物并上前恭愍王金印請更已

名曰旦從之是月遼東都指揮使司奏朝鮮國招引女直五百餘人潛渡鴨綠江欲入寇乃遣使敕諭旦示以禍福詞甚厲旦得敕惶懼陳謝貢方物并械送遁逃軍民三百八十餘人至遼東二十七年旦遣子入貢二十八年遣使柳珣表賀明年正旦帝以表文語慢詰責之珣言表文乃門下評理鄭道傳所撰遂命逮道傳釋珣歸二十九年旦送撰表人鄭總等三人至云表實總等所撰道傳病不能行帝以總等亂邦構釁留不遣三十年冬復以表涉譏訕拘其使建文初旦表陳年老以子芳遠襲位許之成祖立遣官頒卽位詔永樂元年正月芳遠遣使朝貢四月復遣陪臣李貴齡入貢奏芳遠父有疾需龍腦沈香蘇合香油諸物齋布求市帝命太醫院

賜之還其布芳遠表謝因請寬服書籍帝嘉其能募中國禮
悉從之賜金印誥命寬服九章圭玉佩玉妃珠翠七翟冠霞
帔金墜及經籍綵幣表裏自後芳遠貢獻歲每四五至焉二
年十二月詔立芳遠長子禔爲世子從其請也五年芳遠表
奉儀物祭仁孝皇后十二月貢馬三千匹至遼東命戶部運
絹布萬五千匹償之六年世子禔來朝賜織金文綺及歸帝
親製詩賜之遣中官黃儼護行賜王朝祭服白金錦綺時朝
鮮納女後宮立爲妃嬪者四人其秋遣陪臣鄭擢來告其父
旦之喪命官弔祭賜旦諡康獻八年九月芳遠表賀平寇獻
馬及方物十一年車駕巡北京復表賀貢馬及人參十六年
芳遠奏世子禔不肖第三子禔孝弟力學國人所屬請立爲

嗣詔聽王所擇芳遠上表謝并陳已年老請以禡理國事
之命光祿少卿韓確鴻臚丞劉泉封禡爲朝鮮國王十七年
六月遣中官齎敕獎諭時帝已遷都北京朝鮮益近而事大
之禮亦益恭中國有慶率遣使表賀貢獻其他慶慰謝恩無
常期或前使未還後使已至朝廷亦待以加禮優恤賜賚他
國不敢望也二十年芳遠卒賜諡恭定賻布帛二十一年七
月禡請立嫡子珣爲世子從之先是敕禡貢馬萬匹至是如
數至賜白金錦綺綵絹洪熙元年二月禡遣使獻方物賀冊
立中宮及皇太子七月頒卽位詔禡奉表賀宣德二年三月
遣中官賜禡白金紵紗羅錦別敕進馬五千匹資邊用九月
如數至四年賜禡書珍禽異獸非朕所貴其勿獻後又敕禡

金玉之器非爾國所產宜止之土物效誠而已禰表謝八年
禰奏遣子弟詣太學或遼東學讀書帝不許賜五經四書性
理通鑑綱目諸書正統元年禰遣使賀卽位二月遣官報賜
三月放朝鮮婦女金黑等五十三人還其國金黑等自宣德
初至京師至是遣中官送回三年八月賜禰遠游冠絳紗袍
玉佩赤舄先是建州長童倉避居朝鮮界已復還建州朝鮮
言昔以窮歸臣臣遇之善今負恩還建州李滿住所慮其同
謀擾邊建州長言所部爲朝鮮追殺阻畱一百七十餘家五
年詔禰還之六年禰奏辨帝優詔答焉後錦衣指揮僉事吳
良等自朝鮮還奏童阿哈里等八十五人俱稱世居朝鮮不
願還其餘有已改及先遠處者皆非朝鮮拘畱因諭李滿住

等不得生釁并諭禡謹飭邊備七年五月諭禡曰鴨綠江一帶東寧等衛密邇王境中多細人逃至王國或被國人誘脅去者母問漢人女直有至者卽解京禡報如旨初瓦剌密令女直諸部誘朝鮮使背中國禡拒之白其事於朝帝嘉其忠敕獎之并賜綵幣八年秋有遼東軍旗八人被寇掠賣與兀良哈得脫至朝鮮禡給資糧送至京九年春有倭寇犯邊禡命將擒獲五十餘人械送京十年又獲餘黨來獻帝連敕獎諭賜賚加等十一年六月遼東守臣奏朝鮮咨稱茂昌郡被野人突入剽掠人畜疑是建州衛部落所爲帝命兵部移文廉察而以璽書諭王曰王前移文至遼鎮已敕總兵等官遣人至彼追緝近都督別里格等將所掠王國男婦十八人送

至遼東賜與衣糧付使臣領回而別里格奏稱女直者兒兀
及先在建州居住於宣德八年被王國棟去男婦十口亦求
朝廷諭王還之免致彼此讐怨主宜遵命以副保境恤鄰之
意十三年冬命使調發朝鮮及野人女直兵會遼東征北寇
時英宗北狩郕王監國已以皇太后命卽位遣官頒詔於其
國景泰元年禡貢馬五百匹奏稱奉敕辦馬二三萬匹比因
鄰寇構釁馬畜踣斃一時未能詔曰寇今少息馬已至者償
其直未至者止勿貢是年夏禡卒遣中官弔祭封禡子珣爲
國王會遼東奏報開原瀋陽有寇入境掠人畜係建州海西
野人女直頭目李滿住等爲嚮導因諭珣相爲犄角截殺將
士有功一體賜賚其秋珣續貢馬千五百餘匹賜珣錢張并

金幣絹布償其直冬又賜珣及妃崔氏誥命封其子弘暉爲世子二年冬以建州頭目潛與朝鮮通戒珣絕其使三年秋珣卒來告哀遣中官往弔祭賜珣諡恭順命子弘暉嗣立弘暉立三年以年幼且嬰夙疾請以叔瑑權國事七年上表遜位於瑑乃封瑑爲國王瑑請立子暉爲世子從之天順三年山東登州衛海船飄入朝鮮船壞物失幾半瑑令人運送鴨綠江給衣糧遣歸賜敕嘉獎旣邊將奏有建州三衛都督私與朝鮮結恐爲中國患因敕諭瑑毋作不靖貽後悔瑑疏辨復諭曰先因邊將奏王與建州三衛頭目交通諭王改過今奏遵諭事理許其往來宣德正統年間以王國與彼互相侵掠敕解怨息兵各保境土初不令交通給賞授官也彼旣受